

PITAR **lokṽ Siti Jichonam** **Mintamchonam**

Pitar gv lvkchonam siti si yordampeelv gv Asia mooku mvnwng lo dookadoya karnv “Pwknvyarnv gv nyi darkunam vdwv,” vla minam kristan vdw sum lvkdumlvjvla lvktoku. Soogv siti gv lvkdung jvngv si purila rinṽ vdw sum oogv bunugv mvngjwng nam lvgabv hirukaya am hila okv mvdwkmvkunam am paala rinṽ um mintvmiru jila mintoku. Lvknv vdwsī Jisu Kristo gv alvnv yunying lvkwng lo ninyigv purinv vdwa mimpa jila mintoku, oogv sila rikunam, turkur kunam okv aakur kujinam gaam am bunua mvngtin dukubv milvpvkvunam um jito. Soogv lvyingbv bunu vdwka hirukaya am laarwk sila saktv rungḁubv rirungḁo, vbvrinam si bunugv mvngtin sinam sum adwng gvṽv bv rika rungḁunṽ vla chirung ḁubv ridu okv “vdwlo Jisu Kristo gv kaatam rikunyi bunugv amin paadw Alu bv rireku.”

Hirukaya hindw am ninyigv mintvmiru la rinam lo, oogv bunugv siti sum purinv vdw sum Jisu Kristo gvḁv rinṽ nyi bv rirungḁubv ridu vla lvknv ngv lvktoku.

Arwng lokṽ darlinnam

Mintamchonam (1:1-2)

Pwknvyarnv gv ringlinbaalin kunam am mvngpanam (1:3-12)

Darwk bv singnamrinam am mintvmirunam (1:13-2:10)

Hirukaya hiri lo Kristan vdwgv kudungkua rigv
sv (2:11-4:19)
Kristan bv rvnyaknam okv kudungkua rinam
(5:1-11)
Minyungminyana (5:12-14)

¹ Jisu Kristo gv Apostol akobv riniv, Pitar lokv—
Pwknvyarnv gv darlin kunam nyebunyi bv
tloblov doosik sikunv, Pontus, Galasia, Kapa-
dosia, Asia okv Bithynia lo doonv vdwa kumrwk-
lvtaksinam siti am lvkdunv. ² Nonua Pwknvyarnv
Abu gv mvngnam lokv darlin pvnv okv ninyigv
Dow lokv nonua darwknv nyi bv ridukubv mv-
toku, vv Jisu Kristo gvlo nonua mingku lo vngmu
dokubv okv ninyigv oyi lokv sarkak modu kubv
vla ritoku.

Anyuaya okv sarsopoyo ngv nonugvlo akomar-
ing bv doolwk yilaka.

Turnam akonyi mvngtinnam

³ Klai ngonu Ahtu Jisu Kristo gv Abu okv
Pwknvyarnvnyi umbonyikv vlaju! Vkvlgavbolo
ninyigv kairungnv ayanam lokv Jisu Kristonyi
sikunvnga turkur mokunam lokv hv ngonua
anwnv turnam am jila ritoku. Si ngonua turnv
mvngtinam lokv pwlwk jidu, ⁴ okv vbvrinamv
ngonu Pwknvyarnv gv nyi vdwa nyitvrungbv
boktalwkji pvnvnama laarwk sidubv kaaya
dunv. Vkvnv vdwa sum ninyi nonugv lvgabv
nyidomooku lo, ogolo bunu vdwloka yaaka
nyomadudw, vbvmajvka nyeka madudw,
vbvmajvka kaapa nyomadudw hoka pvvching
jidu. ⁵ Oogv boktalwkjinam vdwa nonu gvngv,
nonu mvngjwngla Pwknvyarnv gv Jwkrw lo

kaachingkaamu dukunv, so si ringlinbaalinam gv lvgabv vvpv pvkunv vv ataranya alu lo kaatam dukubv mvpvripv duku.

⁶ Vbvrijvka vjvgv so nonuno lvgabv mvngru rungubv ridu nvpv vkvlgavbolo hirukaya nam nvgwngnv adwkaku vv nonuno enduku, vbvrijvka nonuno ho lvkwnglo sum himpu sitoka.

⁷ Bunugv svbv rinam si nonugv mvngjwng nama jjv dunvdw um kaabwkrwsik nvnvbv ridu. Ain aka, mvyakmvchak dunv umka vmv lokv ramkwrampak la ridu; okv oogv apiabv nonugv mvngjwng aka, oogv ain aka arv doyanv umka, hingkw rungto, vbvribolo vv hirukaaya hinjvka chetamrvnam gvlareku. Vbvribolo Jisu Kristo gv kaatam sidw alu am Pwknvyarnv gvlo nonuno hartvnama paareku okv paknam gorungbo mvngdv rungnam gobv laarwk sireku. ⁸ Nonuno ninyia kaapa makwng jvka, ninyia nonuno pakdu, okv nonuno ninyia vjv kaapa majvka, nonuno ninyia jvjvrungnv ngv vla mvngdu. Vbvrinamv oogv gaam lokv minji lamanam achialvbv kairungnv gobv mvngpunam okv Yunglit kunv um nonugv haapok lo mvngpu mola ridu, ⁹ vkvlgavbolo nonugv ninyia mvngjwng sijo am nonu yalu gv turku nama laarwk sitv duku.

¹⁰ Ringbaalinnam soogv lvgabv nyijwk vdwgv kaachartayarla makimaidu okv tvcharkayar la ritoku, okv bunu vdww nonua oogv Pwknvyarnv gv jisv amin lvkwng lo mincho jitoku. ¹¹ Vdw nyibvdw okv oguaingbv aaredw* um bunu vdww

* **1:11** Vdwnyibvdw okv ogu aingbv aaredw; Vmalo Yvvdw oogv aajinv okv vdwnyi aaredw.

malin nvpv vla rikwto. Soogv dw sum kvvlo Kristo gv yaluv bunu gvlo doolwkla, Kristo gv hindarkaso hinsv nga okv yunglit kusv nga kaatamla riku nama um bunu mincho pvvtoku. ¹² Pwknvyarnv nyijwk vdwgv bunugv oogv kudungkua rinamv bunugv atubogv pwbinpaabin yanam lvga bvma, vbvritola nonugv lvgabv vla kaatam toku, oogv nyido lokv imunam Darwknv Dow gv jwkrw lokv oogv alvnnv yunying go gindungpingko vdwgv lokv bunugv vbv oogv lvkwnglo japji kunama um vjak nonuno tvvduku. Svkvnnv jvjvnnv oguogu soka Nyidogindung vdwwka chinwngla ritoku.

Darwk bv singnam lvgabv goknam

¹³ Vkvlgabv, nonugv mongrumara lo kudungkua ridubv doya tvka. Nonu chvrv rungbv doya laka, vdwlo nonua Jisu Kristo gv kaatam rekudw oogv boktalwkji jitiv kunam um nonugv mvngtin sinam mvnwng nga tinlwk laka. ¹⁴ Pwknvyarnv gvlo tvnvrinv gobv ritoka, okv vdwlo nonu gvlo chingkupaaku mabv ribvdw um nonugv mvngnam lokv rigvdagvnnv um nonugv singnam lo rimu koyoka. ¹⁵ Vbvmabvya, nonua goklinnv Pwknvyarnv gv darwknv aingbv, nonugv rinam mvnwng lo darwk nvbv rito laka. ¹⁶ Darwknv kitap vv mindu, “Darwk tvlaka ogulvgavbolo ngo darwk nvngvla.”

¹⁷ Vdwlo nonu Pwknvyarnvnyi kumyidw, nonuno ninyia Abu vla mindu, akin akingv ogubv ripvdw vbvrinam lokv, nyi mvnwng nga lvyinakin bv jwngkadaka dunv; Vkvlgabv nonugv sichingmooku so turdunam soogv lvvnnv

tungv sum ninyigv lvgabv busu la mvngdv kaadvla rilaka. ¹⁸ Holvgavbolo nonu abuapa vdwgv lokv arv kaama bv rigv nam lokv ogugo jila rvvlin kubvdw um nonu chindu. Vkvnv vv bunu ain vmalo raaji aingbv rinu ogu mvyakmvchak dubv rila jinv yikimora mago; ¹⁹ so si ungnvtarv kaamanv vmalo tarintatv kaamanv svlarkuu aingbv, Kristo gv erinpeelwk sunamv maatar alvbv arv doyachoknv gobv rikunamv. ²⁰ Hv Pwknvyarnv gv nyiamooku am pwklynarlin madvyilo gvngv gaklin chonamv okv ataranya alua nonu lvgabv kaatam la ritoku. ²¹ Ninyigv lokv nonu Pwknvyarnvnyi mvngjwng do, yvvdw ninyia sinam loka turkur molaku yunglit dubv jikunv; okv vkvlgabv nonugv mvngjwng okv mvngtinu Pwknvyarnv gvlo mvnggap lwkdu.

²² Vjak nonugv jvju am tvvlapala rinam lokv nonu atubonga darkw dubv mvsu duku okv nonugv kvvbi ajin vdwgv lvgabv dinchikochi bv aya minsu duku, vbvrinam † lokv ajin anyingnga dinchi rungbv aya minsudu. ²³ Holvgabv vbvri-nam lokv turdunv okv Pwknvyarnv gv gamchar doobvnu lokv nonuno anw bv kuu bvngdw kuanam, Sikamajinv abu gv umvuu gobv ridukunv.

²⁴ Darwknv kitap vbv mindu,

“Nyia mvnwng ngv Nvsingnvmwng aingbv ridu,
okv bunugv yunglit namv mootum gv apun-
gana aingbv ridu.

Nvsingnvmwng ngv singkup duku, okv apungana
ngv holu duku,

† **1:22** Nonugv haapok mvnwng; Kitap Kvgonv doomadu Darwk-
chongjornv haapok lokv. **1:24** Aij 40:6-8

²⁵ Vbvritola Ahtu gv gamchar ngv dvbvdwk-
ibv doobvdu.”
So gamchar si Alvnnv Yunying ngv um nonua jappo
jitoku.

2

Turnv lvngtung okv Darwknv diringmooku

¹ Vbvrikunamv, alvmanv mvnwng lokv;
mvvnam lokv vmajvka kaadutadubv rinam
lokv vmajvka kaanektanek nam lokv vmajvka
miyimimbong nam gaam lokv nonu vdww vkvnnv
rinam um kayu tokuka. ² Anga ajwng bvnglin
sonam aingbv ritoka, darwknv dowjwklo gv
achu mvngchik lo tvngnwng dvdvla ritoka, vbv
tvngla rinam lokv nonuno singcharicha reku
okv ringnam bvka reyiku. ³ Darwknv kitap vbv
mindu, “nonu vdww atubongv chinsudu Ahtu
ninyi vdwgo alvdu vla.”

⁴ Nyi vdwgv anyung kaamanv dara kunam bv
rijvka, Pwknvyarnv gvlo anyung doonv turnv
vlwng darnambv, Ahtu gvlo aatoka. ⁵ Turnv
vlwng vdwgv aingbv ritola aatoka, okv nonuno
atubongv Dowjwklo pwknvyarnvnaam govb
mvnvrinv kotoka, nonuno ogolo darwknv nyibu
govb dowjwklo jilwk la okv Jisu Kristo gv lokv
Pwknvyarnv gvlo erinpeelwkla laarwk sinam am
riya nvgobv rire. ⁶ Vkvlgabv Darwknv kitap vbv
mindu

“Ngo alam doyachoknv vlwng am dardunv,
um ngo Jayon gv chenyung agumai lo lvng-
tung govb tunglwk jidu;

Okv yvvdw ninyia mvngjwng dudw vv vd-
wloka mvngjung sula rimare.”

7 Alvjbv nonu mvngjwng sinv vdwgv lvgabv
soogv vlwng si kairungnv anyung doyachoknv
gobv ridu; Vbvrítola oogv yvvdw mvngjwng
madudw:

“Naam mvnv vdwgv vlwng darpak la dara kunam
anyung kaama nvgobv
ora kunamv mvnwng dvdvgv lokv alvyachok
nvgobv ritoku.”

8 Okv darwknv kitap so akonvlo mindu,
“Soogv vlwng si nyi mvnwng nga dwktup pukmap
modubv mvre,
Oogv lvngtv pvngv vv bunua gimup lodubv
mvre.”

Ogulvgabv bunu gamchar minji nvnga mvngjwng
mabv ritola bunu dwktupla ritoku; Vbvching
ridubv vla Pwknvyarnv gv bunugv lvgabv mvn-
grung namv. ⁹ Vbvrítola nonuno darlin ku-
nam opi ngv, Dvbv gv nyibu bv rinv vdww, dar-
wknv nyitwng ngv, Pwknvyarnv gv awgv nyiv,
Pwknvyarnv gv kaasartabo dubv rinam am japgo
kardubv darnamv, oogv kanvparam lokv nonua
atubogv angusinv kaasartabo jvnnv loung lo goklin
toku. ¹⁰ Kvvlo nonu Pwknvyarnv gv nyi bv ri-
mato, vbvrítola vjak nonuno vkvgv nyi bv riduku;
kvvlo nonuno Pwknvyarnv gv aya nga chima bv
rito, vbvrítola vjak nonuno vkvgv aya nga laarwk
siduku.

Pwknvyarnv gv nyira

2:7 Miri 118:22 **2:8** Aij 8:14,15 **2:9** Mog 19:5,6; Aij 43:20;
Mog 19:5; Det 4:20; 7:6; 14:2; Tai 2:14; Aij 43:21; Aij 9:2 **2:10** Hos
2:23

¹¹ Ngoogv ajin vdwa, nyiamooku soogv nye-bunyi gobv okv nyen kelwk la rinvgobv vla minchumire bv minjvka! oogv adwnamar gv yalu am nyiru kibv gvnv maatar alvbv mvngjimvn-gro namlo jilwk suma bvka, vla ngo nonua mindunv. ¹² Vdwlo Pwknvyarnvnyi chimanv vdww nonua alvmanv gobv minjvka, nonugv gwngdunggwngpa nga bunugv pingkolo alvnbv kaatam sito laka, vbvribolo bunu Pwknvyarnv gv ninyigv aakur dw alua nonugv alvnbv kudungkua rinam am kaachin silai ikula okv Pwknvyarnvnyi hartvbamtv la rireku.

¹³ Vkvlgabv Ahtu gv lvgabv nyi vdwwgv tujupkunan arwng lo aw am tulwk sutoka: oogv kai yabv rigvdubv tujupkunam Dvbvyachok gvloka, ¹⁴ okv oogv gobunor vdww, oogv alvmanv kudungkua rinv nga mvrit dubv okv alvbv kudungkua rinv um hartvla ninyigv parlin kunam um gobv tulwk sutoka. ¹⁵ Holvgabv Pwknvyarnv nonua alvnbv kudungkua riku lokv ridula oogv pvchaaria bv japsingjabanv nyi gaam minv um mintor jitoka vla mvngdu. ¹⁶ Ajarabinv nyi gobv singto ritoka; ogubv rikwngjvka, noogv ajarabi bv ridunv um rimur bv rinvla rigv nvyoka, vbvritola Pwknvyarnv gv nyira aingbv singtolaka. ¹⁷ Mvnwng nga mvngdv tvlaka, kvvbi mvngjwngnv vdwa paktoka, Pwknvyarnvnyi ayum tvlaka, okv Dvbvyachoknyi mvngdv tvlaka.

Kristo gv hirukaya hinam lo minchi sinvnam

¹⁸ Pakbu vdww nonuno awgv atu gvlo atubonga tulwksula okv mvngdv kaadvla rinam am bunua kaatam sula ritoka, yvvdw ayala okv tulwkla rinv

um mvngchik tikmabv, vbvritola yvvdw hirukaya mola ridunv umka mvngdv laka. ¹⁹ Nonugv hirukaya paamasvgo paamu jvka um saktvla ribolo, Pwknvyarnv gv aya nga boktalwkjire ogulvgavbolo nonu ninyigv mvnglwk ka chindu. ²⁰ Holvgabv nonugv rigakpanam riku lvgabv dvngsv go doola dvngku dula um chetamrvnam la ribolo nonu ogugo paare? Vbvritola nonu alvnnv kudungkua lvgabv hirukaya am hinla ridubolo, Pwknvyarnv oogv vbvrinam lvgabv nonua aya nga boktalwkjire. ²¹ Svkvnv um lvgabvdv nonua Pwknvyarnv goktoku, ogulvgavbolo Kristo ninyi avv nonu lvgabv erit am hintoku okv vkvlvgavbolo nonuno ninyigv lvchu kurpv kolo kurpv minggv dubv vla nonua kaaring sidubv rijitoku. ²² Hv rimur namgo rima, okv yvka ninyigv riu lokv mvvnamrunam gaam go vdwloka aadu bv tvvpamato. ²³ Vdwlo ninyia minjimiyo kubvdw, vbvrijvka Hv minjimiyo nam gaam minamgo mirwk simato, vdwlo ninyia hirukaya dubv mvrit bvdw, vbvrijvka hv alvmabv ritv ngurv mato, vbvritola takdamvra bv jwngkadaka jinv, Pwknvyarnv gvlo mvngtin sila ritoku. ²⁴ Kristo ngonu rimur am gvla ninyigv adwnamar lokv daapolo gvvlwk jito, vkvlvgavbolo ngonu rimur lo sirung reku okv darwkchonjor nvlo turreku. Vbv ninyigv ungtarv gvvnamm lokv ngonugv lvvma nga pomu pvkunv. ²⁵ Nonu ho gv svlar go ninyigv lamtv vngtung nga nyemu tvla ngakramnv aingbv ridu, vbvritola vjak nonu Svlarayanv okv yalua Kaachingyanv gv vngkulo vngming gvdbv vjak

laakur kunamv.

3

Nywnng vdwv okv Nyilu vdwv

¹ Oogv aingbv nywnng vdwv nonu nyilu lo tulwk sirung laka, vkvlgavbolo bunu vdwv ako gvlo Pwknvyarnv gv gaam mvngjwng manam go doo-
jvka, nonugv alvbv rinam lokv bunua mvngjwng
dubv riya yareku. Vbvriboldo nonugv ogu gaam
mingkwng svgo kaamare. ² Ogulvgavbolo bunu
vdwv nonua vdwgo darwk bv okv mvngdvla
rigvnam am bunu kaare. ³ Nonu awgv adw-
namar gv agumai mvngchika kaapu mvngchik
dubv oogv dwmw tuklap simwngnam vmajvka
tasinglaktv gvnam lo, vmajvka vjivbe gvjg-
pak mvngchik la rimabvka. ⁴ Vbv kaaputain
dubv vla rimum svnga, nonu kaaputain am
nonugv jvjvrungnv mongrumara arwng lo kaa-
putain am rito laka, arwnglo kaaputain bv doob-
vnnv rvniak okv sarsopoyonv dowv, Pwknvyarnv
gv kaagelo kairungnv anyung doyachoknv gobv
ridu. ⁵ Holvgabv kvvlo lokv rungrwngnv nyimv
Pwknvyarnv gvlo mvngtinla ribu vdwv bunugv
nyilu vdwgv lo tulwksudu la kaaputain nvgobv
mvsu nyatoku. ⁶ Sara ka vbvrinv nyimv gobv
rito; Hv Abraham gv gaam mingkulo vngnv gobv
rito okv ninyia atubogv nyilu atuv vla minto.
Vjak nonu vdwv ogu guka busukano kaamabv
okv nonu alvnnv kudungkua ridubolo nonu vkvgv
kuunyimv bv ridukunv.

⁷ Oogv aingbv nonu nyilu vdwka nonugv ny-

3:1 Epe 5:22; Kol 3:18

3:3 1Tim 2:9

3:6 Atk 18:12

3:7

Epe 5:25; Kol 3:19

wng ngv lvvkumaya nvgo vla chindula lvkobv doobam tvlaka. Bunua mvngdv gvrila paktoka, ogulvgavbolo Pwknvyarnv gv turnam amin jinam am, vv bunuka nonua lvkin gobv doobamdak-bamla laarwk sire. Vkvlgabv svbvching ritoka ho nonugv kumnam lo oguguka risiriyak kaamare.

Tarwkbak kudungkua rikulo hiruhinam

⁸ Minyungminya: bvku, nonu mvnwng gv mvngnam okv hinamkaanamv lvyinakin runglaka; ajin anyingnga pakmi silaka, okv aya la, okv ajin anyingnga angamai minsu laka.

⁹ Alvmanv nga alvmanv bv rirwk siyoka vmajvka, beenv nga beerwk siyoka; Vbvrinabvya, boktalwkji nama jikur jiya tvkuka, vkvlgavbolo boktalwkjinam si vdwlw Pwknvyarnv gv nonua gokyilo jidubv vla milvpvkkunamv. ¹⁰ Darwknv kitap vbv mindu,

“Nonu himpu bv singwng dubolo

okv alvnnv alu am kaanwng dubolo

nonu alvmanv japdunam lokv kayu tokuka

okv alvmanv mvvdung dunam am kayu tokuka.

¹¹ Nonu alvmanv lokv linto kulaka okv alvnnv rito kulaka;

Nonugv haapok mvnwng lokv sarsopoyonam lvgabv rito laka.

¹² Holvgabv Ahtu darwkchongjor nvnga kaaya dunv

okv bunugv kumnam am tvvdunv;

vbvritola yvvdw alvmanv ridunv um hv kaanwng madunv.”

13 Nonu alvnuv kudungkua ngv ogudw um
 ridubolo yvula nonuam alvmabv rijinv? 14
 Vbvritola alvnuv ogudw um rinam lvgabv
 hindarkaso go hindubolo, vv vdwgo nonu lvgabv
 mvngpu nambv ridukunv! Yvnyika busu
 mabvka okv mvngdwk mabvka. 15 Vbvritola
 nonugv haapok arwng lokv Kristo lvgabv
 mvngdv namgobv rilaka, okv ninyia Ahtu gobv
 mvngdv tvlaka. Nonugv arwnglo mvngtin nama
 yvvdw tvka dunv um minchar jila mirwk sila
 dubv mvngkimvngak pvla dw mvnwng nga
 doya kilaka, 16 vbvritola damdv gvrila okv
 mvngdv gvrila ritolaka. Nonugv mvngnam
 am mvngbwkchirwk tvlaka, vkvlgavbolo
 nam minvkmirwk la, Jisu Kristo gvlo riming
 gvvnam am yvvdw alvmabv minjvka nonugv
 albv rigvnam lokv kokwng lo ogugo bunu
 mimpvdw hinying lakula rireku. 17 Holvgabv
 Pwknvyarnv gv mvnglwkw bv ridu mvngdubolo,
 alvmanv kudungkua rimum svnga albv rinam
 lvgabv hiruhinam si alvyachok nambv ridu,
 18 Holvgabv Pwknvyarnv gvlo nonua aalwk gvvji
 nam lvgabv Kristo mvnwng rimur lvgabv, alvnuv
 nyi akobv ritola rimurnv vdwgv sidubv lvkin
 lo, okv sijitoku. * Jisunyi adwnamar bv simuto,
 vbvrijvka Dowjwklo lokv turkur motoku, 19 okv
 ninyigv Dowjwklo lokv doodula, patwk lo apv
 kunam dowjwklo vdwa Jisu aala doin japgo karji
 toku. 20 Soogv dowjwklo vdwsi vdwlo Noah gv
 ninyigv svpwa pwkla riyi alu lo Pwknvyarnv

3:14 Mt 5:10 **3:14** Aij 8:12,13 * **3:18** Sijitoku; Achialv kitap
 lo si doodu Hinchingo. **3:20** Atk 6:1-7:24

saktvla doyanam vdww Pwknvyarnv gv gaam minama tvvmabv ribu vdw vmabv. Svpw lo nyi twngchingto— piinw mvngchikgo— isigv lokv ringlin kunamv, ²¹ oogv nonugv baptisma laala ringlin kunam am paadukunv, oogv kaarwsinv nvnv am kaatam sinv dukunv. Si adwn awgv takit am sukak sunam lvga bvma, vbvritola albbv mvngdvr kunam lokv Pwknvyarnv gvlo milv kunamv. Si Jisu Kristo gv turkur kunam lokv ringlin kunam am paamuduku, ²² oogv nyidomooku bv chaatoku okv Pwknvyarnv gv lakbik lo doodu kula, nyidogindung vdwa okv nyidomooku gv rigvnnv tujupkunam okv jwkrw mvnwnv am rigvdogv duku.

4

Singdinridin Kunam

¹ Kristo adwnayak lo hirukaya am hinjito, oogv vbvrinam aingbv nonuka atubongv maatar albbv vbv vngdwng rungbv mvngla dootoka; Ogulvgavbolo yvvdw adwnamar lo hirukaya hindunv vv rimur lo rima dunv. ² Vbvrkunamv, vjak lokv, nonuno sichingmooku soogv singdung nga ridv svnga Pwknvyarnv gv mvnglwv bv ritoka okv nyia mvngdung bv mvngjimvngro yoka. ³ Nonuno kvvlo gv richodocho lo Pwknvyarnvnyi chimabv ogubv mvngpvdw vbv nonuno awgo ritoku. Nonugv rinamdaknamv hinyinghirunam, yonwngnam, tvngkiumnam, apamara lo rimisinam, vsiopo lo tvngkamdvkam nam okv kaanwngtanwng manam murti kunam vkvnv singdunglo ritoku.

⁴ Okv vdwlo nonu Pwknvyarnvnyi chimanv vdwgv rikulo lvkinbv rikumabv aachiaak la okv kaami sila rikunamv bunu lamka singak la ridu, okv nonua minvmirvla bunu alvmabv riduku. ⁵ Vbvrijvka oogv turnv okv sinv vdwgv jwngkadakala ridukubv doyalala ririkunyi vv bunu Pwknvyarnv gvlo bunu awv kiikahaka la jilwk jireku. ⁶ Vkvlgabvdv siku loka alvnnv yunying nga japgo kardunv, oogv yvvdw bunugv adwnamar lo rinamdaknam am jwngkadaka la rinam aingbv, vbv mvnwng nga jwngkadaka dukunv; vkvlgabv bunu dowjwklo gv rinamdaknam lo Pwknvyarnv gvlo vbv alvbv dooladakla dubv bunu gvlo sum japgo kartoku.

*Pwknvyarnv gv Amin gnv alvbv Rungriapari-
any*

⁷ Ogumvnwng gv ataranya ngv nvchi duku. Nonu atubongv kumla sinam lvgabv saktv sula okv hingusula dooto laka. ⁸ Ogumvnwng am lvyabv, ajin anying am alvbv pakmi sitoka, ogulvgavbolo pakmi sinamv rimur achialvgo mamlup la ridu. ⁹ Purmi sinam kaamabv nonugv naam riapgu am kvvbi lvgabv chikuk pvjila rito laka. ¹⁰ Pwknvyarnv gv angu angusinv amin jinam am alvbv rungriaparia nvgobv, nyichar dvdv ngv bunu Pwknvyarnv gvlo angusibv amin paanam am kvvbi ajin vdwgv alvnam lvgabv rinvnngnv rungtoka. ¹¹ Yvvdw japgo kardudw vv, Pwknvyarnv gv doin am japgo karto laka; yvvdw kudungkua ridunv, Pwknvyarnv gv jinam kudungkua lokv gwlvkrungbv rito laka, vbv riku lokv mvnwng yikungyira lvgabv Pwknvyarnvnyi

Jisu gv lokv umbonyikv vla hartv nvla dubv, hartvnamv okv jwkrwv Jisu Kristo gvlo doobv yilaka. Amen.

Kristan akobv rinam lokv Hirukaya hinam

¹² Ngoogv ajin vdw, vbv nonugv achiapik hindung dunv um, nonu vdwloka hinkw manam ogugo ridunvgo vla lamyoka. ¹³ Kristo gv hirukaya hingkulo nonugv himing gvdunam am mvngpu yala riya tvlaka, ogulvgavbolo vdwlo ninyigv kairungnv turnamv yunglit lwkri kudw um nonu gvlo himpuv akomaring lwkreku. ¹⁴ Nonua minjimio dubolo nonu mvngpu laka, ogulvgavbolo nonu Kristo gv rikulo riming gvnv ngv; soogv si Pwknvyarnv gv Dowv, yunglitnv Dowv, nonu gvlo doolwkdu. ¹⁵ Nonu gvlo hirukaya namgo hindu bolo vv nonugv minvlvnnv gobv vmajvka dvchonv akobv, vbv majvka dvgiolagionv, vmajvka nyi kvvbigv ritung nga rigoripen jinam lokv bvma. ¹⁶ Vbvrijvka nonugv Kristan akobv riku lokv hirukaya hindubolo, um nonu hinyinghiru mavvka vbvritola nonu kristo gv amin am gvnvnam lvgabv Pwknvyarnvnyi umbonyikv vya tvka.

¹⁷ Jwngkadaka rirap dwv aaduku, okv Pwknvyarnv gv atubogv nyi am jwngkadaka chori nvpv. Ngonu gvlo rirap chobolo, Pwknvyarnv gv alvnnv yunying am tvvla mvngjwng simanv vdwv anyunganya nyiku ogunvbv riyikudw? ¹⁸ Darwknv kitap vbv mindu, “Alvnnv nyi am ringnam lvgabv si achialvgo adwkaku namgo;

vbvrikubolo Pwknvyarnvnyi chimabv
rimurnv vdwv kokwng lo ogubv rireku?"

19 Vbvrinamv, yvvdw hirukaya hindudw vv
bunu Pwknvyarnv gv mvnglwkw bv ridubv bunu
atubonga Pwklinyarlinv gvlo mvngtin sinam
am jilwk sidula alvnnv kudungkua ridubv rirung
tvlaka.

5

Pwknvyarnv gv Svlarlartwng ngv

¹ Ngo gvrja gv nyigagatv akobv, nonugv gvrja
nyigagatv vdwgv aralo lvbu dunv. Ngooka Kristo
gv hirukaya hinam am kaayanv akobv rin
ngv, okv oogv kaatamritam la ririkunyi ngo ka
hoka yunglit am paaming gvvreku. Ngo nonua
lvbu dunv, ² oogv Pwknvyarnv svlarlartwng
nga kaaya dubv jinam am kaaya nwngdula
kaaya tvka, vbv Pwknvyarnv gv nonua ritoka
vla mvngnama, okv kaaya nwnngmanv aingbv
rimabvka. Nonugv kudungkua ritoka, rijo
lvgabv mvngla rimabv, vbvritola alvjvbw mvngla
rinwng dula ritoka. ³ Nonugv aralo yvvnyi
ringchumriai dubv apvpvdw um nonuno vkvgv
aolo chatinkurbo dubv gwngyoka, vbvritola
svlarlartwng nga rigvnnv kaagv sinvgobv ritoka.
⁴ Okv vdwlo svlarkaayanv Kaiyachoknv aaredw,
nonu vdwloka nyeeka majinv oogv unglitnv
biotung nga laarwk sireku.

⁵ Oogv apiabv boruya nyi vdw nonu awv ab-
wng yanv vdwgv aralo tulwk sila ritoka. Okv

nonu mvnwng ngv ajin anyingnga nyanyak minsula riji minsu la rirungtoka; holvgabv Darwknv Kitap vbv mindu “Pwknvyarnv kai mvngsu nvnga kaanwng madu, vbvritola rvnyak nvnga aya nga kaatam la ridu”⁶ Vbvrikunamv nonuno awv Pwknvyarnv gv kairungnv lak aralo rvnyak sunv gobv rito laka, vbvribolo ninyigv atubogv alvnnv alu lo nonua kairungnv paknam gobv svvdungsvrap chaareku.⁷ Nonugv lamnam-bunam am Pwknvyarnv gvlo apak jito laka ogulvgabv Pwknvyarnv nonugv lvgabv ringcham-riai la ridu.

⁸ Chvrvsopa tvlaka, hinggu suto laka! Nonugv nyimakv, Uyudvbv ngv, abvngapa gv gamla dsvv godaka vla harhar la ngago karnam aingbv, nyi gonyi mvki dubv mago karla ridu.⁹ Nonugv mvngjwng am hvngdwng rungtu laka, okv ninyia charpak minsu tvlaka, ogulvgabv nonu chindu nyiamooku mvnwng so mvngjwngnv vdvw nonugv hirukaya hinam lvyinakin bv hindu.¹⁰ Vbvrijvka nonugv hirukaya hironam kokwng bv, Pwknvyarnv gv anyuaya mvngwng ngv, oogv nonuam Kristo gvlo akin gobv ridula ninyigv turbwngnv anyuaya nga paaming gvmu dubv goklin pvkunv, ninyi atubongv nonua rvbwngching more okv adwngchingnam, gwlvknam okv alvrungnv lvngtung bv dwlvk jirungre.¹¹ Ninyigv jwkrwv dubv yilaka! Amen.

Minyungminya bv Kumrwksinam

¹² Ngoogv Kristan jwkjwkvrvknv boru gobv mvngnam Silas gv ridurnam lokv soogv siti burch-

ing go ngo nonuam lvkdunv. Sum ngo nonuam mintvmiru nvso mvngla okv si Pwknvyarnv gv jvjvrungnv anyuaya ngv vla mintam sidunv. Vd-wloka dvlobak yoka. ¹³ Pwknvyarnv gv darlin nam, nonugv anyibornv gvrja Bebilon, * ngv nonua kumrwkltak gaam am jilwkdu, okv ngoogv kuunyilo mark ka nonuam kumrwksinam am jilwkdu. ¹⁴ Ajin anyingnga Kristan pakmi sinam bv mopopdvtak nam am jimisidu.

Kristo gvbv doonv mvnwng gvlo sarsopoyo namv lvkingobv nonu gvlo doolwk minggv yilaka.

5:13 Nyim 12:12,25; 13:13; 15:37-39; Kol 4:10; Pilem 24 * **5:13** Bebilon Nyikrwkaatamnam gv kitap lo vbv doodu, si Rom am mimpala mindu.

ANWNV GAMLV
Tagin first Bible translation based on TEV (Good News)

copyright © 2018 The Word for the World International

Language: (Tagin)

Contributor: The Word for the World International

The New Testament in Tagin

Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed